

欽定天文正義卷七十二

妖星占考

妖星占考

秦末項羽救鉅鹿枉矢西流枉矢所觸天下之所伐射滅亡象也物莫直於矢今蛇行不能直而枉者執矢者亦不正以象項羽執政亂也羽遂合從抗秦人屠咸陽凡枉矢之流以亂伐亂也

漢孝文後二年正月壬寅天欒夕出西南占曰為兵喪其六年十一月匈奴入上郡雲中漢起三軍以衛京師八月天狗下梁楚

孝景三年七月天狗下占為破軍殺將狗又守禦類

也天狗所降以戒守禦其年吳楚反攻梁梁堅城
守遂伏尸流血其下 中三年六月壬戌蓬星見
西南在房南去房可二丈大如二斗器色白癸亥
在心東北可長丈所甲子在尾北可六丈丁卯在
箕北近漢稍小且去時大如桃壬申去凡十日占
曰蓬星出必有亂臣房心間天子宫也是時梁王
欲為漢嗣使人殺漢爭臣袁盎漢按誅梁大臣斧
鉞用梁王恐懼布車入闕伏斧鉞謝罪然後得免
孝武建元六年八月長星出於東方長終天三十日

去占曰是為蚩尤旗見則王者征伐四方 元狩
四年四月長星又出西北

孝昭始元中蓬星出西方天市東門行過河鼓入營
室中梁成恢曰蓬星出六十日不出三年下有亂
臣戮死於市 元鳳五年四月燭星見奎婁間占
曰有土功邊城和其六年正月築遼東元菟城二
月度遼將軍范朋友擊烏桓還

王莽地皇四年王尋王邑圍昆陽有營頭星墮軍上
孝明永平八年六月長星出柳張三十七度犯軒轅

刺天船陵太微氣至上階凡見五十六日去柳周地是歲多雨水郡十四傷稼

靈帝熹平二年四月有星出文昌入紫微宮蛇行有首尾無身赤色有光照垣牆占曰文昌為上將貴相後六年司徒劉羣為中常侍曹節所譖下獄死光和中國皇星東南角去地一二丈如炬火狀十餘日不見占曰國皇星為內亂外內有兵喪獻帝初平三年九月蚩尤旗見長十餘丈色白出角亢之南占曰蚩尤旗見則主征伐四方

魏高貴鄉公正元元年十一月白氣出南斗側廣數丈長竟天王肅曰蚩尤之旗也東南其有亂乎晉武帝咸寧四年四月蚩尤旗見東井後年傾三方伐吳是其應也

惠帝元康四年九月甲午枉矢東北行竟天六年六月丙午夜有枉矢自斗魁東南行按占曰以亂伐亂北斗主執殺出斗魁居中執殺者不直之象也永康元年三月妖星見南方占曰妖星出天下大兵將起光熙元年五月枉矢西南流

元帝大興三年四月壬辰枉矢出虛危沒翼軫占曰
枉矢所觸天下之所伐翼軫荊州之分野

穆帝升平二年十二月枉矢自東南流於西北其長
半天 四年十月庚戌天狗見西南占曰有大兵
流血

孝武太元二十年九月有蓬星如粉絮東南行歷女
虛至哭星占蓬星見不出三年必有亂臣戮死於
市

齊東昏侯永元三年正月乙巳長星見竟天二月蚩

尤旗見

梁武帝普通元年九月乙亥有星晨見東方光爛如
火占曰國皇見有內難有急兵反叛 中大通五

年正月己酉長星見

陳後主至德元年正月壬戌蓬星見

隋文帝仁壽四年六月庚午有星入於月中

煬帝大業三年三月辛亥長星見西方竟天于歷奎
婁角亢而沒至九月辛未轉見南方亦竟天又于
角亢頻掃太微帝座于犯列宿唯不及參井經歲

乃滅占曰去穢布新天所以去無道建有德見久
者災深星大者事大行遲者期遠兵大起國大亂
而亡餘殃為水旱饑饉土功疾疫其後築長城討
吐渾及高麗兵戎連歲水旱疾疫土功相仍羣盜
并起邑落空虛 十二年九月戊午有枉矢出北
斗魁委曲蛇行注於南斗占曰主以兵去天之所
伐亦曰以亂伐亂

唐武后光宅元年九月二十九有星如半月見西方
肅宗上元元年閏四月二十一日妖星見於西方長
數丈至五月滅

唐代宗廣德二年六月丁卯有妖星隕於汾州 大
歷七年十二月丙寅有長星於參下其長亘天長
星彗屬參唐星也

昭宗景福元年五月蚩尤旗見初出有白彗形如髮
長二尺許經數日乃從中天下如匹布至地如蛇
六月孫儒攻楊行密於宣州有黑雲如山漸下隊
於儒營上狀如破屋占曰營頭星 乾寧元年七
月妖星見非彗非孛不知其名時人謂之妖星或

曰惡星 天復元年有三赤星各有鋒芒在南方
既而西方北方東方亦如之頃之又各增一星凡
一十六星少時先從北滅占曰濛星也見則諸侯
兵相攻已巳夕有星當箕下如炬火炎炎上衝人
初以為燒火也高文餘乃隕天下有亂

昭宣帝天祐元年四月有星狀如人首赤身黑在北
斗下紫微中占曰天衝也 二年四月庚子夕西
北隅有星類太白上有光似彗長三四丈色如赭
辛丑夕色如縞或曰五車之水星也一曰昭明星

也 三年十二月昏東方有星如太白自地徐上
行極緩至中天如上弦月乃曲行頃分之為二占
曰有大孽

後唐明宗天成元年三月惡星入天庫流星犯天棓
宋真宗咸平六年十一月辛亥旄頭犯輿鬼占與彗
同

高宗紹興元年九月偽齊長星見於是劉豫謀明年
遷 三十一年六月己巳北斗天權星東北有一
小星出光似彗太史指以為含譽非也

孝宗淳熙十四年五月有星出濁際大與日等入時
與日相摩蕩

明宣宗宣德五年十月丙申蓬星見外屏南東南行
經天倉天庾八日而滅

神宗萬歷三十七年有大星見西南芒刺四射四

十六年十一月丙寅旦有花白星見東方

熹宗天啟元年四月癸酉赤星見於東方

愍帝崇禎九年冬十月天狗見豫分十七年五月
戊子朔天狗下尾白長竟天六月有大星出西方

芒燄閃爍搖不定

彗孛占考

春秋魯文公十四年秋七月有星孛入于北斗左傳
周內史叔服曰不出七年宋齊晉之君皆將死亂
昭公十七年冬有星孛于大辰傳曰有星孛於大辰
西及漢申須曰彗所以除舊布新也天事恒象今
除於火火出必布焉諸侯其有火災乎
哀公十三年冬十一月有星孛于東方公羊孛者何
彗星也其言於東方何見於旦也

貞定王二年彗星見

考王八年彗星見

赧王十年彗星見 十二年彗星見 十九年彗星

見

秦始皇七年彗星先出東方見北方五月見西方十六日 九年星見或竟天四月見西方又見北方從斗以南八十日 十三年正月彗星見東方

三十三年明星出西方

徐廣曰皇甫謐天彗星也

漢高帝三年七月有星孛於大角旬餘乃入劉向以為是時項羽為楚王霸諸侯而漢已定三秦項羽

相拒滎陽天下歸心於漢楚將滅故彗除王位也

文帝後七年有星孛於西方其本直尾箕末指虛危長丈餘及天漢十六日不見劉向以為尾宋地今楚彭城也箕為燕又為吳越齊宿在漢中負海之國水澤地也是時景帝新立信用鼂錯將誅正諸侯其象先見後三年七國反皆誅滅云

孝景二年彗星出西南其三年吳楚七國反 中三年三月丁酉彗星見西北其色白長丈在甬觿且去益小十五日不見占曰必有破國亂君伏死其

辜觶觶梁也其年梁王得罪

孝武建元三年三月有星孛於注張歷太微干紫宮
至於天漢春秋星孛於北斗齊魯晉之君皆將死
亂今星孛歷五宿其後濟東膠西江都王皆坐法
削黜自殺淮南衡山反誅 三年四月有星孛於
天紀至織女占曰織女有女變天紀為地震至四
年十月而地動 六年六月有星孛於西方 元
封元年五月有星孛於東井又孛於三台其後江
充作亂京師紛然此明東井三台為秦地效也

元封中星孛於河戍占曰南戍為越門北戍為胡
門其後漢兵擊拔朝鮮以為樂浪玄菟郡朝鮮在
海中越之象也居北方胡之域也 太初中星孛
於招搖星傳曰客星守招搖蠻夷有亂民死君其
後漢兵擊大宛斬其王招搖遠夷之分也

宣帝地節元年正月有星孛於西方去太白二丈所
劉向以為太白為大將彗孛加之掃滅之象也明
年大將軍霍光薨後二年家夷滅

元帝初元五年彗星出西北赤黃色長八尺所後數

日長丈餘東北指在參分後二歲餘西羗反

成帝建始元年正月有星孛於營室青白色長六七丈廣尺餘 元延元年七月辛未有星孛東井踐五諸侯出河戍北率行軒轅太微後日六度有餘晨出東方十三日夕見西方犯次妃長秋斗填蝨炎再貫紫宮中大火當後達天河除於妃后之域南逝度犯大角攝提至天市而按節徐行炎入市中旬而後西去五十六日與蒼龍俱伏

哀帝建平二年二月彗星出牽牛七十餘日傳曰彗所以除舊布新也牽牛日月五星所從起歷數之元三正之始彗而出之改更之象也其出久者為其事大也

王莽地皇三年十一月有星孛於張東南行五日不見孛星者惡氣所生為亂兵或謂之彗星所以除穢而布新也張為周地星孛於張東南行即軫翼之分軫翼為楚是周楚地將有兵亂後一年正月光武起兵舂陵破南陽更始為天子都雒陽西入長安光武興河北復都雒陽居周地除穢布新之

象

光武建武十五年正月丁未彗星見昴稍西北行入營室犯離宮三月乙未至東壁滅見四十九日彗星為兵入除穢昴為邊兵彗星出之為有兵至十一月定襄都尉陰承反太守隨誅之盧芳從匈奴入居高柳至十六年十月降上璽綬一曰昴星為獄事是時大司徒歐陽歆以事繫獄踰歲死營室天子之常宮離宮后妃之所居彗星入營室犯離宮是除宮室也三十年閏月甲午水星在東井

二十度生白氣東南指炎長五尺為彗東北行至紫宮西藩上五月甲子不見凡見三十一日水常以夏至放於東井閏月在四月尚未當見而見是羸而進也東井為水衡水出之為大水是歲五月及明年郡國大水壞城郭傷禾稼殺人民白氣為喪有災作彗所以除穢紫宮天子之宮彗加其藩除宮之象

孝明帝永平三年六月丁卯彗星出天船北長二尺所稍北行至亢南百三十五日去天船為水彗出

為大水是歲伊維水溢到津城門壞伊橋郡七縣
三十二皆大水 十八年六月己未彗星出張長
三尺轉在郎將南入太微皆屬張張為周地東都
太微天子廷彗星犯之為兵喪

孝章建初元年八月庚寅彗星出天市長二尺所稍
行入牽牛三度積四十日稍減十二月戊寅彗星
出婁三度長八九尺稍入紫宮中百六日滅為大
人忌

孝安永初三年十二月彗星起天苑南東北指長六
七尺色蒼白天苑為外軍彗星出其南為外兵其
後任尚馬賢等擊羗降之

孝順永建六年彗星出於斗牽牛滅於虛危虛危為
齊牽牛吳越故海賊浮於會稽山賊捷於濟南
六年二月丁巳彗星見於東方長六七尺色青白
西南指營室及墳墓星丁丑彗星在奎一度長六
尺癸未昏見西北歷昴畢甲申在東井遂歷輿鬼
柳七星張光炎及三台至軒轅中滅營室者天子
常宮墳墓主死彗星起而在墳墓營室不出五年

天下有大喪昂為邊兵又為趙羗周馬父子後遂
為寇又劉文叔清河相射暲欲立王蒜為天子暲
不聽殺暲王閉門距文官兵捕誅文蒜以惡人所
劫廢為尉氏侯又徙為犍陽都鄉侯薨國絕歷東
井輿鬼為秦皆羗所攻鈇炎及三台為三公是時
太尉杜喬及故太尉李固為梁冀所陷入坐文書
死及至注張為周滅於軒轅中為後宮

孝桓建和元年八月乙丑彗星芒長五尺見天市中
東南指色黃白九月戊辰不見時梁冀驕亂延

熹四年五月辛酉客星在營室稍順行生芒長五
尺所至心一度轉為彗占為大喪

孝靈光和元年八月彗星出亢北入天市中長數尺
稍長至五六丈赤色經歷十餘宿八十餘日乃消
於天苑中彗除天市天帝將徙帝將易都至初平
元年獻帝遷都長安三年冬彗星出狼弧東行
至於張乃去張為周地彗星犯之為兵亂後四年
京都大發兵擊黃巾賊七月彗星出三台下東行
入太微至太子幸臣二十餘日而消光和五年

二月彗星出奎逆行入紫宮後三出六十餘日乃消

獻帝初平四年十月孛星出兩角間東北行入天市中而滅占曰彗除天市天帝將徙帝將易都是時上在長安後二年東遷明年七月至雒陽其八月曹公迎上都許建安五年十月辛亥有星孛於大梁冀州分也時袁紹在冀州其年十一月紹軍為曹軍所破七年夏紹死後曹公遂取冀州九年十一月有星孛於東井與鬼入軒轅太微十

一年正月星孛於北斗首在斗中尾貫紫宮及北辰十二年十月辛卯有星孛於鶉尾荊州分也時荊州牧劉表據荊州時益州從事周羣以荊州牧將死而失主明年秋表卒以小子琮自代曹公將伐荊州琮懼舉軍詣公降十七年十二月有

星孛於五諸侯周羣以為四方專據土地者皆將失土時益州牧劉璋據益州漢中太守張魯別據

漢中韓遂據涼州宋建別據枹罕

後漢書作枹罕

明年冬

曹公遣偏將擊涼州十九年獲宋建韓遂逃於羌

中病死其年璋失益州二十年秋公攻漢中魯降
二十三年三月孛星辰見東方二十餘日夕出
西方犯歷五車東井五諸侯文昌軒轅后妃太微
鋒炎指帝座占曰除舊布新之象也

魏文帝黃初六年十月乙未有星孛於少微歷軒轅
占為兵喪除舊布新之象時帝軍廣陵辛丑親御
甲冑觀兵

明帝太和六年十一月丙寅有星孛於翼近太微上
將星占曰為兵喪甘氏曰孛彗所當之國是受其
殃翼又楚分野孫權封畧也明年權有遼東之敗
又明年諸葛亮入秦川孫權發兵緣江淮屯要衝
權自圍新城以應亮天子東征權 青龍四年十
月甲申有星孛於大辰長三尺乙酉又孛於東方
十一月乙亥彗星見犯宦者天紀星占曰大辰為
天王天下有喪劉向五紀論曰春秋星孛於東方
不言宿者不加宿也宦者在天市為中外有兵天
紀為地震 景初二年八月彗星見張長三尺逆
西行四十一日滅占同上張周分野

少帝正始元年十月乙酉彗星見西方在尾長二丈
拂牽牛犯太白十一月甲子進犯羽林占曰尾為
燕又為吳牛亦吳越之分太白為上將羽林為中
軍兵為吳越有喪中軍兵動二年五月吳遣三將
寇邊吳太子登卒六月宣帝討諸葛恪於皖太尉
滿寵薨 六年八月戊午彗星見七星長二尺色
白進至張二十三日滅 七年十一月癸亥又見
軫長一尺積五十六日滅 九年三月又見昂長
六尺色青白芒西南指七月又見翼長二尺進至
軫積四十二日滅按占曰七星張為周分野翼軫
為楚昂為趙魏彗所以除舊布新主兵喪也嘉平
元年宣帝誅曹爽兄弟及其黨與皆夷三族京師
嚴兵三年誅楚王彪又襲王陵於淮南淮南東楚
也魏諸王幽於鄴 嘉平三年十一月癸亥有星
孛於營室西行積九十日滅占曰有兵喪室為後
宮後宮有亂 四年二月丁酉彗星見西方在胃
長五六丈色白芒南指貫參積二十日滅 五年
十一月彗星又見軫長五丈在太微左執法西南

指積百九十日滅按占曰胃兗州之分野參主兵
太微天子庭執法為執政孛彗為兵喪除舊布新
之象

高貴鄉公正元二年正月有彗星見於吳楚分西北
竟天鎮東大將軍毋丘儉等據淮南叛景帝討平
之 甘露二年十一月彗星見角色白占曰彗星
見兩角間色白者軍起不戰邦有大喪

元帝景元三年十一月壬寅彗星見亢色白長五寸
轉北行積四十五日滅占曰為兵喪一曰彗星見

亢天子失德四年鐘會鄧艾伐蜀剋之二將俱以
反誅 咸熙二年五月彗星見王良長丈餘色白
東南指積十二日滅占曰王良天子御駟彗星掃
之禪代除舊布新之象也白色為喪王良在東壁
宿又并州之分野

晉武帝泰始四年正月丙戌彗星見軫青白色西北
行又轉東行占曰為兵喪軫又楚分野 五年九
月星孛於紫宮 十年十二月有星孛於軫占曰
天下有兵起軫又楚分野 咸寧二年六月甲戌

星孛於氐占曰天子失德易政氐又兖州分七月
星孛於大角大角為帝座八月星孛於太微至翼
北斗三台占曰太微天子庭大人惡之翼又楚分
野北斗主殺罰三台為三公 三年正月星孛於
西方三月星孛於胃胃徐州分四月星孛於女御
女御為後宮五月又孛於東方七月星孛紫宮
五年三月星孛於柳四月又孛於女御七月孛於
紫宮占曰外臣陵主柳又三河分野大角太微紫
宮女御並為王者明年吳亡是其應也孛主兵喪

征吳之役三河徐兖之兵悉起交戰於吳楚之地
吳丞相都督以下梟戮十數偏裨行陣之徒馘斬
萬計皆其徵也 太康二年八月有星孛於張占
曰為兵喪十一月星孛於軒轅占曰後宮當之
四年三月戊申星孛於西南是年齊王攸任城王
陵琅邪王伾新都王詠薨 八年九月星孛於南
斗長數十丈十餘日滅占曰斗主爵祿國有大憂
一曰孛於斗王者疾病天下易政大亂兵起
惠帝元康五年四月有星孛於奎至軒轅太微經三

台大陵占曰奎為魯又為庫兵軒轅為後宮太微
天子庭三台為三司大陵有積尸死喪之事 永
康元年十二月彗星出牽牛之西指天市 二年
四月彗見齊分占曰齊有喪時齊王罔起兵討趙
王倫倫滅罔明年復敗 太安元年四月彗星晝
見 二年三月彗見東方指三台占曰兵喪象三
台為三公 三年正月東海王越執太尉長沙王
乂張方又殺之 永興二年八月有星孛於昴畢
占曰為兵喪昴畢又趙魏分野十月丁丑有星孛
於北斗彊國發兵諸侯爭權是後諸王交兵皆有
應

成帝咸和四年七月有星孛於西北犯斗二十三日
滅占曰為兵亂十二月郭默殺江州刺史劉胤荆
州刺史陶侃討默斬之時石勒又始僭號 咸康
二年二月辛巳彗星夕見西方在奎占曰為兵喪
奎又為邊兵三年正月石季龍僭天王位四年石
季龍伐慕容皝不克既退皝追擊之又破麻秋時
皝稱蕃邊兵之應也 六年二月庚辰有星孛於

太微

康帝建元元年十一月六日彗星見亢長七尺白色
占曰亢為朝廷主兵喪

穆帝永和五年十一月乙卯彗星見於亢芒西白色
白長一丈 六年正月丁丑彗星又見於亢占曰
為兵喪疾疫其五年八月褚裒北征兵敗十一月
冉閔殺石遵又盡殺胡十餘萬人於是中土復大
亂十二月褚裒薨是年大疫 升平二年五月丁
亥彗星出天船在胃占曰為兵喪除舊布新出天

船外夷侵一曰為大水四年五月天下大水

哀帝興寧元年八月有星孛於角亢入天市按占曰
為兵喪

孝武寧康元年正月丁巳有星孛於女虛經氐亢角
軫翼張至二月丙戌彗星見於氐九月丁丑有星
孛於天市占曰為兵喪太元元年七月符堅破涼
州虜張天錫 太元十五年七月壬申有星孛於
北河或經太微三台文昌入北斗色白長十餘丈
八月戊戌入紫微乃滅占曰北河或一名胡門胡

門有兵喪掃太微入紫微王者當之三台為三公
文昌為將相將相三公有災入北斗諸侯戮一曰
掃北斗強國發兵諸侯爭權大人憂

安帝隆安四年二月己丑有星孛於奎長三丈上至
閣道紫宮西蕃入北斗魁至三台三月遂經於太
微帝座端門十二月戊寅有星孛於貫索天市天
津占曰貴臣獄死内外有兵喪 義熙十一年五
月甲申彗星二出天市掃帝座在房心北房心宋
之分野按占得彗柄者興除舊布新宋興之象

十四年五月庚子有星孛於北斗魁中七月癸亥
彗星出太微西柄起上相星下芒漸長至十餘丈
進掃北斗紫微中台

恭帝元熙元年正月戊戌有星孛於太微西蕃

宋武帝永初三年二月丙戌有星孛於虛危十一月

戊午有星孛於營室

少帝景平元年正月乙卯有星孛於東壁十月己未
有星孛於氐

文帝元嘉十九年九月丙辰有客星在北斗因為彗

入文昌貫五車掃畢拂天節經天苑季冬乃滅
二十六年十月癸卯彗星見於太微 二十八年
四月乙卯彗星見於昴六月壬子見太微中對帝
座

齊和帝中興元年三月乙巳彗星竟天

梁武帝大同五年十月辛丑彗出南斗長一尺餘東
南指漸長一丈餘十一月乙卯至婁滅占曰天下
有謀王者其八年五月安成民劉敬恭挾左道反
黨與數萬九年李賁稱皇帝於交州

陳文帝天嘉元年九月癸丑彗星長四尺芒指西南
占曰彗星見則敵國兵起得本者勝其年周將獨
孤盛領衆趣巴湘侯瑱襲破之 六年六月辛酉
有彗長丈餘見於上台占曰陰謀姦宄起一曰宮
中火起

廢帝光大二年六月丁亥彗星見

宣帝大建七年四月丙戌有星孛於大角 十二年
十二月辛巳彗星見西南占曰有兵喪

後魏明元帝泰常元年五月甲申彗星二見

北齊武成帝河清四年三月彗星見占曰除舊布新
易主至四月傳位太子

後主天統元年六月壬戌彗星出文昌東北其大如
手後移長乃至丈餘百日乃滅 四年彗星見於
東井七月孛星見房心白如粉絮大如斗東行八
月入天市漸長四丈犯瓠瓜歷虛危入室犯離宮
九月入奎至婁而滅孛亂之氣占曰兵喪並起易
政大臣誅

周武帝保定五年六月庚申彗星出三台入文昌犯

上將後經紫宮西垣入危漸長一丈餘指空壁後
百餘日稍短長二尺五寸虛危滅齊之分野 天

和三年六月甲戌彗見東井長一丈上白下赤而
光漸東行至七月癸卯在鬼北八寸所乃滅占曰
為兵國政崩壞將軍死大臣誅 建德三年四月
乙卯星孛於紫宮垣外大如拳赤白指五帝座漸
東南行稍長一丈五尺五月甲子至上台北滅

隋文帝開皇八年十月甲子有星孛於牽牛 十四
年十一月癸未彗星孛於虛危及奎婁齊魯之

分野其後魯公虞慶則伏法齊公高頴除名

煬帝大業三年二月己丑彗星見於東井文昌歷大陵五車北河入太微掃帝座前後百餘日而止四年彗星出五車掃文昌至房而滅十一年六月有星孛於文昌東南長五六寸色黑而銳夜動搖西北行數日至文昌去宮四五寸不入却行而滅占曰為急兵其八月突厥圍帝於鴈門矢及帝前十三年六月有星孛於太微五帝座色黃赤長三四尺所數日而滅九月彗見於營室

唐高祖武德九年二月壬午有星孛於胃昴間丁亥孛於卷舌孛與彗皆非常惡氣所生而孛災甚於彗

太宗貞觀八年八月甲子有星孛於虛危歷亥枵乙亥不見十三年三月乙丑有星孛於昴畢十五年六月己酉有星孛於太微犯卽位七月甲戌不見

高宗龍朔三年八月癸卯有彗星於左攝提長二尺餘乙巳不見攝提建時節大臣象乾封二年四

月丙辰有彗星於東北在五車畢昴間乙亥不見
上元二年十二月壬午有彗星於角亢南長五
尺三年七月丁亥有彗星於東井指北河長三丈
餘東北行光芒益盛長三丈指中台指文昌九月
乙酉不見東井京師分中台文昌將相位兩河天
闕也 開耀元年九月丙申有彗星於天市中長
五丈漸小東行至河鼓癸丑不見市者貸食之所
聚以衣食生民者一曰帝將遷都河鼓將軍象
永淳二年三月丙午有彗星於五車北四月辛未

不見

中宗景龍元年十月壬午有彗星於西方十一月甲
寅不見 二年二月丁酉有星孛於胃昴間八月
壬辰有星孛於紫宮

睿宗延和元年六月有彗星自軒轅入太微至大角
滅

明皇開元十八年六月甲子有彗星於五車癸酉有
星孛於畢昴 二十六年三月丙子有星孛於紫
宮垣歷北斗魁旬餘因雲陰不見

肅宗乾元三年四月丁巳有彗星於東方在婁胃間
色白長四尺東方疾行歷昴畢觜觿參東井輿鬼
柳軒轅至右執法西凡五旬餘不見閏月辛酉朔
有彗星於東方長數丈至五月乃滅婁為魯胃昴
畢為趙觜觿參為唐東井輿鬼為京師分柳其半
為周分二彗仍見者荐禍也又婁胃間天倉

代宗大曆元年十二月己亥有彗星於瓠瓜長尺餘
經二旬不見犯宦者星五年四月己未有彗星
於五車光芒蓬勃長三丈餘五月己卯彗星見於

北方色白癸未東行近八穀中星六月癸卯近三
公己未不見占曰色白者太白所生也

憲宗元和十二年正月戊子有彗星於畢

穆宗長慶元年正月己未有星孛於翼二月丁卯孛
於太微西上將六月有彗星於昴長一丈凡十日
不見

文宗太和二年七月甲辰有彗星於右攝提南長二
尺八年九月辛亥有彗星於太微長丈餘西北
行越卽位庚申不見開成二年三月丙午有彗

星於危長七尺餘西指南斗戊申在危西南芒耀
愈盛癸丑在虛辛酉長丈餘西行稍南指壬戌在
婺女長二丈餘廣三尺癸亥愈長且濶三月甲子
在南斗乙丑長五丈其末兩岐一指氐一掩房丙
寅長六丈無岐北指在亢七度丁卯西北行東指
己巳長八丈餘在張癸未長三尺在軒轅右不見
凡彗星辰出則西指夕出則東指乃常也未有遍
指四方凌犯如此之甚者八月丁酉有彗星於虛
危虛危為元枵枵耗名也 三年十月乙巳有彗

星於軫魁長二丈餘漸長西指十一月乙卯有彗
星於東方在箕尾東西亘天十二月壬辰不見
四年正月癸酉有彗星於羽林衛分也閏月丙午
有彗星於卷舌西北二月己卯不見 五年二月
庚申有彗星於營室東壁間二十日滅十一月戊
寅有彗星於東方燕分也

武宗會昌元年七月有彗星於羽林營室東壁間也
十一月壬寅有彗星於北落師門在營室入紫宮
十二月辛卯不見并州分也

宣宗大中六年三月有彗星於觜參唐星也 十
一年九月乙未彗星於房長三尺

懿宗咸通五年五月己亥夜漏未盡一刻有彗星出
東方色黃白長三尺在婁徐州分也 九年正月
有彗星於婁胃 十年八月有彗星於大陵東北
指占為外夷兵及水災

僖宗乾符四年五月有彗星 光啓元年有彗星於
積水積薪之間 二年五月丙戌有星孛於尾箕
歷北斗攝提占曰貴臣誅

昭宗大順二年四月庚辰有彗星於三台東行入太
微掃大角天市長十丈餘五月甲戌不見宦者陳
匡知星奏曰當有亂臣入宮三台太一三階也太
微大角帝庭也天市都市也 景福元年十一月
有星孛於斗牛占曰越有自立者 二年三月天
久陰至四月乙酉夜雲稍開有彗星於上台長十
丈餘東行入太微掃大角入天市經三旬有七日
益長至二十餘丈因雲陰不見 乾寧元年正月
有星孛於鶉首秦分也 天祐二年四月甲辰有

彗星見於河北貫文昌長三丈餘陵中台下台五月乙丑夜自軒轅左角及天市西垣光芒猛怒其長亘天丙寅雲陰至辛未少霽不見兩河為天關在東井間而北河中國所經也文昌天之六司天市都市也

梁太祖乾化二年四月壬申彗出張甲戌彗出靈臺後唐明宗天成三年十月庚午彗出西南長丈餘東南指在牛宿五度至三夕不見

末帝清泰三年九月己丑彗出虛危長尺餘形微細

經天壘眾星

晉高祖天福六年九月壬子彗出西方掃天市垣長丈餘八年十月庚戌彗見東方西指尾迹長一尺在角九度

周世宗顯德三年正月壬戌夜有星孛於參宿其芒指於東南

宋太祖皇帝開寶八年六月甲子彗出柳長四丈晨見東方西南指歷輿鬼至東壁凡十一舍八十三日而滅是歲平江南

太宗端拱二年六月戊子有彗出東井積水西青白色光芒漸長晨見東北旬日夕見西北歷石攝提凡三十日至亢沒

真宗咸平元年正月甲申有彗出營室北光芒尺餘至丁酉凡十四日滅 六年十一月甲寅有星孛於井鬼大如杯色青白光芒四尺餘犯五諸侯歷五車入參凡三十餘日沒占有燕兵明年冬契丹入寇 天禧二年六月辛亥彗出北斗魁第二星東北長三尺許與北斗第一星齊北行經天牢拂

文昌長三丈餘歷紫微三台軒轅遠行而西至七星凡三十七日沒

仁宗明道二年戊戌東北方有含譽星見其色黃白有光芒長二尺許或以為彗 景祐二年八月壬戌夜有星孛於張翼長七尺濶五寸十二日而沒十二月己未夜有星出外屏有芒氣 皇祐元年二月丁卯彗出虛晨見東方西南指歷紫微至婁凡一百一十四日而沒占有兵喪 嘉祐元年七月彗出紫微歷七星其色白長丈餘至八月癸

亥滅

英宗治平三年三月己未彗出營室晨見東方長七尺許西南指危泊墳墓漸東遠行近日而伏至辛巳夕見西北有星無芒彗益東行別有白氣一濶三尺許貫紫微極星并房宿首尾入濁益東行歷文昌北斗貫尾至壬午星復有芒彗長丈餘濶三尺許東北指歷五車白氣為岐橫天貫北河五諸侯軒轅太微五帝座內五諸侯及角亢氐房宿癸未彗長丈五尺有星孛氣如一升器歷營室至張

北一十四舍積六十七日星氣孛皆滅占曰白氣長星也孛氣孛也光如筭者彗也為兵喪水旱饑疫之災

神宗熙寧八年十月乙未星出東南軫度中如填青白丙申西北生光芒長三尺斜指軫若彗丁酉光芒長五尺戊戌長七尺斜指左轄至丁未入濁不見主兵喪 元豐三年七月癸未彗出西北太微垣即位南白氣長一丈斜指東南在軫度中丙戌向西北方行在翼度中戊子長三尺斜穿即位癸

卯犯軒轅至丁酉入濁不見庚子晨復出於張度
中至戊午凡三十有六日沒不見主郎位除舊布
新兵喪火災又主京城有兵變

哲宗紹聖四年八月己酉彗出氐度中如填有光色
白氣長三尺斜指天市垣巳星九月壬子光芒長
五尺入天市垣己未犯天市宦者主侍臣有憂庚
申犯天市垣帝座戊辰沒不見主兵喪大水及赦
又主五穀大貴侍臣有憂又主人民亂大臣憂

徽宗崇寧五年正月戊戌彗出西方如杯口大光芒

散出如碎星長六丈濶三尺斜指東北自奎宿婁
胃昴畢後入濁不見主兵喪大饑西北宜備之
大觀四年五月丁未彗出奎婁光芒長六尺北行
入紫微垣至西北入濁不見主水旱穀傷兵饑人
主惡之

欽宗靖康元年六月壬戌彗出紫微垣主天下兵變
破軍亡國閏十一月彗竟天時金人入寇京城失
守

高宗紹興元年十二月戊寅彗星見 二年八月甲

寅彗見胃占彗大則除舊布新兵饑疫癘水旱交
興至九月甲戌乃沒次年金陷金州入興元 十
五年四月戊寅彗出東方宿度內五十餘日乃沒占
為兵饑臣下失忠務私彗掃除之丙申復出參度
旬有五日後乃伏是歲蒙國始建號改元五月丁巳
彗星因為客星其色青白占喪 十六年十二月
戊戌彗出西南危宿 十七年正月乙亥彗出東
北方女宿二月二日乃伏 二十二年七月丙午
彗見東北方井宿內丁未其星如木星光芒長二

尺占天所以去無道建有德彗出有叛者兵起大
水晉邦尤甚彗晨見東方又為君臣爭明癸丑夜
彗星犯五諸侯占大臣憂執法之臣凶

孝宗淳熙二年七月辛丑夜西北泛出一小星在紫
微垣外七公星之上小如火星參然蓬勃體氣蒼
白是為孛星占孛星惡氣所生為亂兵又云參然
孛焉兵之類也無內亂則水兵天下合謀闇蔽不
明有所傷害災甚於彗

寧宗嘉定十五年八月甲午彗星出右攝提光芒三

丈已上其體小如木星凡兩月行歷氐房心乃沒
占彗本類星末類彗大則除舊布新天所以去無
道而建德彗出有叛者兵起其國彗星昏見其
國受兵於是其應金主殂九月壬戌彗星消伏
理宗紹定三年十一月丁酉有星孛於天市垣屠肆
星之下明年二月壬午乃消 五年閏九月庚戌
彗星出於角詔中外臣僚指陳缺失諸路監司察
守令之貪廉仁暴及民間利便疾苦以聞十月己
未始消 嘉熙四年正月辛未彗星出營室甲午

犯王良西南第二星三月辛未始滅 景定五年
七月甲戌彗星見於柳芒角燭天長十餘丈日高
方斂凡月餘己卯退於鬼辛巳退於井戊戌退於
參八月戊午消伏甲子復見於參辛未化為霞氣
凡四月乃滅詔中外直言臺諫士庶皆上書乞罷
公田

遼太宗會同四年九月壬申有星孛於晉分
聖宗開泰三年正月丁酉夕彗星見西方
道宗咸雍二年三月壬午彗星見西方 太康五年

十二月丙午彗星犯尾 壽隆三年八月乙巳彗
星見西方

金太宗天會十年八月辛亥彗星出於文昌

熙宗皇統五年四月丙申彗星見於西北長丈餘至
五月壬戌始滅 七年正月辛未彗星出東方長
丈餘凡十五日滅

宣宗興定六年八月己卯彗星出於角亢右攝提周
鼎之間指大角九月丁未滅太史奏除舊布新之
象宜改元修政以消天變於是改是年為元光元

年

哀宗天興元年閏九月己酉彗星見東方色白長丈
餘彎曲如象牙出角軫南行至十二日長二丈十
六日月燭不見二十七日五更復出東南約長四
丈餘至十月一日始滅凡四十有八日

元世祖至元元年七月甲戌彗星出輿鬼昏見西北
貫上台掃紫微文昌及北斗旦見東北凡四十餘
日詔改元大赦天下 十四年癸亥彗星出東北
長四尺餘 三十年十月庚寅彗星入紫微垣抵

斗魁光芒尺許凡一月乃滅

仁宗皇慶二年三月丁未彗出東井 延祐二年十

一月丙午客星變為彗犯紫微垣歷軫至壁十五

宿明年二月庚寅乃滅

順帝至元三年四月甲戌有星孛於王良至七月壬寅沒於貫索五月丁卯彗星見於東北如天船星大色白約長尺餘指西南在昴五度戊辰往西南行日益速至六月辛未芒彗愈長約二尺餘丁丑掃上丞己卯光芒愈甚約長三尺餘入園衛壬午

掃華蓋紅星乙酉掃勾陳大星及天皇大帝丙戌貫四輔經樞心甲午出園衛丁酉出紫微垣戊戌犯貫索掃天紀七月庚子掃河間癸卯經晉鄭入天市垣丙午掃列肆己酉太陰光盛微辨芒彗出天市垣掃梁星至辛酉光芒微小在房宿鍵閉之上罰星中星正西日漸南行凡見六十有三日自昴至房歷一十五宿至八月庚午乃滅 六年二月己酉彗星如房星大色白狀如粉絮尾跡約長五寸餘彗指西南在房七度漸往西北行至三月

庚辰凡見三十有二日 至正十一年十一月辛

亥孛星見於奎癸丑見於婁甲寅見於胃乙卯亦如之丙辰見於昴丁巳微見於畢 十六年八月

甲戌彗星見於正東如軒轅左角大色青白彗指

西南約長尺餘在張十七度一十分至十月

紀作十二

月戊午滅跡西北行四十餘日 二十年三月戊

子彗星見於東方 二十二年二月乙酉彗星見

光芒約長丈餘色青白在危七度二十分丁酉犯

離宮西星至二月終光芒約長二丈餘三月戊申

不見星形惟有白氣形曲竟天西指掃大角壬子

行過太陽前惟有星形無芒如酒杯大昏濛色白

在昴六度至戊午始滅跡六月辛巳彗星見於紫

微垣在牛二度九十分色白光芒約長尺餘東南

指西南行戊子掃上宰至七月乙卯始滅 二十

三年三月辛丑彗星見東方經月乃滅 二十六

年九月庚子孛星見於紫微垣北斗權星之側色

如粉絮約斗大往東南行犯天樞辛丑在尾十八

度五十分壬寅在女二度五十分癸卯在女九度

九十分甲辰在虛初度八十分乙巳出紫微垣北
斗權星玉衡之間在軫東南行犯天棓經漸臺輦
道去虛宿壘壁陣西方星始滅

明太祖洪武元年正月庚寅彗星見於昴畢三月辛
卯彗星出昴北大陵天船間長八尺餘指文昌近
五車四月己酉沒於五車北 六年四月彗星三
入紫微垣 二十四年四月丙子彗星二一入紫
微垣闔闔門犯天牀一犯六甲掃五帝內座

成祖永樂五年十一月丙寅彗星見 十三年八月

有星孛於南斗

宣宗宣德六年四月戊戌有星孛於東井長五尺餘
七年正月壬戌彗星出東方長丈餘尾掃天津
東南行十月始滅是月戊子又出西方十有七日
而滅 八年閏八月壬子彗星出天倉旁長丈許
己巳入貫索掃七公己卯復入天市垣掃晉星二
十有四日而滅

英宗正統四年閏二月己丑彗星見張宿旁大如殛
丁酉長五丈餘西行掃酒旗迤北犯鬼宿六月戊

寅彗星見畢宿旁長丈餘指西南計五十有五
日乃滅 九年七月庚午彗星見太微東垣長丈許
累日漸長至閏七月己卯入角沒 十四年十二
月壬子彗星見天市垣市樓旁歷尾度長二尺餘
至乙亥沒

景帝景泰元年正月壬午彗星出天市垣外掃天紀
星 三年三月甲午朔有星孛於畢 七年四月
壬戌彗星東北見於胃長二尺指西南五月癸酉
漸長丈餘戊子西北見於柳長九尺餘掃犯軒轅

星甲子見於張長七尺餘掃太微北西南行六月
壬寅入太微垣長尺餘十二月甲寅彗星復見於
畢長五寸東南行漸長至癸亥而沒

英宗天順元年五月丙戌彗星見於危若動搖者東
行一度芒長五寸指西南六月癸巳朔見室長丈
餘由尾至東壁犯天大將軍卷舌第三星井宿水
位南第二星十月己亥彗星見於角長五寸餘指
北犯角北星及平道東壁 三年十月彗星見
五年六月戊戌彗見東方指西南入井度七月丙

寅始滅

憲宗成化元年二月彗星見三月又見西北長三丈
餘三閱月而沒 四年七月有星孛於台斗九月
己未有星東北行越五日芒長三文餘尾指西南
變為彗星其後晨見東方昏見室南犯三公北斗
搖光七公轉入天市垣出垣漸小犯天屏西第一
星十一月庚辰始滅 七年十二月甲戌彗星見
天田西指尋北行犯右攝提掃太微垣上將及辛
臣太子後官尾指正西橫掃太微垣郎位己卯光

芒長大東西竟天北行二十八度餘犯天槍掃北
斗三公太陽入紫微垣內正晝猶見自帝星北斗
魁庶子后宮勾陳天樞三師天牢中台天皇大帝
上衛閣道文昌上台無所不犯乙酉南行犯婁天
河天陰外陰天囷至八年正月丙午行奎宿外屏
漸微久之始滅

孝宗弘治三年十一月戊戌彗星見天津南尾指東
北犯人星歷杵臼十二月戊申朔入營室庚申犯
天倉 十三年四月甲午彗星見壘壁陣上入室

壁間漸長三尺餘指離宮掃造父過太微垣漸入紫微垣近女史犯尙書六月丁酉沒

武宗正德元年七月己丑有星見紫微西藩外如彈丸色蒼白越數日有微芒見參井間漸長二尺如帚西北至文昌庚子彗星見有光流東南長三尺越三日長五尺許掃下台上星入太微垣十五年正月彗星見十六年正月有星孛於東南頃之橫絕東西復為鉤屈

世宗嘉靖二年六月有星孛於天市十年閏六月

乙巳彗星見於東井長尺餘掃軒轅第一星芒漸長至翼長七尺餘東北掃天鐫入太微垣掃郎位行角度東南掃亢北第二星漸斂積三十四日而沒十一年三月彗星見八月己卯彗星見於東井長尺許後東北行歷天津漸至文餘掃太微垣諸星及角宿天門至十二月甲戌凡一百一十五日而滅十二年六月辛巳彗星見於五車長五尺餘掃大陵及天大將軍漸長丈餘掃閣道犯騰蛇至八月戊戌而滅十八年四月庚戌彗星見

長三尺許光指東南掃軒轅第八星旬日始滅
三十三年五月癸亥彗星見天權旁犯文昌行入
近濁積二十七日而沒 三十五年正月庚辰彗
星見進賢旁長尺許西南指漸至三尺餘掃太微
垣次相東北入紫微垣犯天牀四月二日滅 三
十六年九月戊辰彗星見天市垣列肆旁東北指
至十月二十三日滅

穆宗隆慶三年十月辛丑朔彗星見天市垣東北指
至庚申滅

神宗萬曆五年十月戊子彗星見西南蒼白色長數
丈氣成白虹由尾箕越斗牛逼女經月而滅 八
年八月庚申彗星見東南方每夜漸長縱橫河漢
凡七十日有奇 九年三月彗星見紫微垣尾射
西北 十年四月丙辰彗星見西北形如匹練尾
指五車歷二十餘日滅 十三年九月戊子彗星
出羽林旁長尺餘每夕東行漸小至十月癸酉滅
十九年三月丙辰西北有星如彗長尺餘歷胃
室壁長二尺閏三月丙寅朔入婁 二十一年七

月乙卯彗星見東井乙亥逆行入紫微垣犯華蓋
二十四年六月己酉彗星見東北芒指西南七
月丁丑彗星見西北如彈丸入翼長尺餘西北行
三十五年八月辛酉朔彗星見東井指西南漸
往西北壬午自房歷心滅 四十六年十月乙丑
彗星出於氐長丈餘指東南漸至西北掃犯太陽
守星入亢度西北掃北斗璿璣文昌五車逼紫微
垣右至十一月甲辰滅 四十七年正月杪彗星
見東南長數百丈光芒下射末曲而腕末幾見於

東北又未幾見於西

愍帝崇禎十二年秋彗星見參分 十三年十月丙
戌彗星見